

# Kewangan punca kelahiran turun

Oleh JOHANNA MUMTAZ  
WANPA

johanna.pa@mediamulia.com.my

**PETALING JAYA:** Faktor kewangan punca utama penurunan kadar kelahiran di negara ini sekali gus menghalang ibu bapa untuk memiliki saiz keluarga yang besar.

Ketua Jabatan Sains Kemasyarakatan dan Pembangunan, Fakulti Ekologi Manusia, Universiti Putra Malaysia (UPM), Profesor Madya Dr. Nik Ahmad Sufian Burhan berkata, status kewangan individu atau keluarga memberi impak yang signifikan terhadap penurunan kadar kelahiran berbanding keadaan ekonomi negara.

Katanya, kenaikan kos sara hidup menyebabkan perbelanjaan untuk membesarkan anak semakin tinggi terutama dalam aspek pendidikan dan penjagaan kesihatan.

“Kebanyakan orang muda akan menangguhkan perkahwinan dan orang yang telah

berkeluarga pula cenderung untuk menangguhkan pertambahan anak atau menjarakkan kelahiran anak mereka.

“Kos perumahan yang tinggi juga memaksa kebanyakan keluarga untuk memperoleh kediaman kecil yang boleh menampung saiz keluarga yang terhad,” katanya ketika dihubungi *Utusan Malaysia*.

Terdahulu, Jabatan Perangkaan Malaysia (DOSM) menunjukkan kelahiran hidup pada suku tahun pertama adalah 106,386 menurun 9.4 peratus berbanding 117,413 pada suku pertama 2023.

Sementara itu, Nik Ahmad berkata, kerajaan perlu menurunkan kos sara hidup dan mewujudkan dasar yang berkesan untuk meningkatkan kadar kelahiran agar jurang umur antara generasi tua dan muda tidak terlalu besar.

“Sekiranya corak penurunan ini tidak diatasi, Malaysia akan menjadi seperti Jepun dan Korea Selatan di mana kadar kela-



**TIGA** wanita bersama bayi mereka yang dilahirkan Hospital Putrajaya Februari lalu. Kewangan dikatakan punca kadar kelahiran menurun di negara ini. - GAMBAR HIASAN

hiran adalah rendah sehingga nisbah bilangan orang tua dalam masyarakat terus meningkat berbanding bilangan golongan muda yang semakin mengecil,”

jelasnya.

Mengulas lanjut mengenai implikasi terhadap kadar kelahiran yang menurun, beliau berkata, ia akan mengakibat-

kan tenaga kerja lebih kecil serta menghalang pertumbuhan ekonomi dan produktiviti terutamanya di kawasan perindustrian seperti Lembah Klang.

Katanya, hal ini juga akan mengurangkan pendapatan boleh guna keluarga, bilangan pekerja muda dan mengehadkan pertumbuhan ekonomi negara sekali gus menurunkan kuasa beli keseluruhan pengguna di Malaysia.

“Dalam jangka masa panjang, kerajaan akan menghadapi tekanan kewangan disebabkan oleh peningkatan perbelanjaan untuk pencen dan penjagaan kesihatan warga emas disertakan dengan pengurangan hasil cukai daripada tenaga kerja yang semakin berkurangan.

“Bilangan golongan muda yang berkurangan akan mengehadkan inovasi dan aktiviti keusahawanan yang membawa kepada pertumbuhan ekonomi lebih perlahan dan berpotensi menurunkan taraf hidup dari semasa ke semasa,” katanya.